

EH Bildu talde politikoa

Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

URUMEA IBAIAREN GARBIKETAREN INGURUKO KONTROL MOZIOA

Olaia Duarte Lopezek, EH BILDU udal taldeko zinegotziak, Udalbatzaren Organo Araudiaren 98. artikulua oinarri, mozio hau aurkezten du Udalbatzan azter dadin. Mozioa 2022ko urtarrilaren 17an Lurraldearen Garapen eta Planifikazio Batzordean aztertutako interpelazioaren ondorioa da.

JUSTIFIKAZIOA

Urtarrilaren 1ean, Eguzki talde ekologistak Urumean, Mundaizko eta Maria Cristina zubien artean, urpeko zabortegei bat zegoela salatu zuen. Egun horretan egindako argazkietan ageri den bezala, somierrak, aulkiak, bizikletak, arropa lixatzeko mahaiak, sukaldeak, hamabost bat komun eta beste hondakin asko pilatu dira ibaian.

Zoritxarrez, horrelako salaketak eta gertaerak ohikoak izan dira azkeneko urteetan: 2016ko apirilean, Loiolako bizilagunek jakinarazita, Urdintxo zubi azpian ur zikinen isuria topatu zen; 2019ko azaroan, Kolon Pasealekuko kolektorearen ondorioz, ibaira isuritako ur beltzen inguruan Eguzkik salaketa egin zuen; 2020an Arrauning enpresak 50 neumatiko atera zituen ibaitik garbiketa baten ondorioz; 2021eko otsailean, hainbat elkarte ekologistek egina, Urumea ibaian, Martutene auzotik igarotzean, isurketa kutsatzaile handien salaketa egin zuten; 2021eko irailean Urumean topatutako zazpigarren isurketa kutsakorren salaketa egin zuen Eguzki taldeak; 2021eko azaroan, Martuteneko 27. Poligono inguruan egindako hidrokarbuo-isurketa egon zen, etab.

Gauzak horrela, eragile ekologistek Udalari zein Kosta Zerbitzuari eskatu diete ibaiko zaborra lehenbailehen garbi dezatela. Aldi berean, ibaira hondakinak inolako kontrolik gabe eta zigorrik gabe bota dituzten norbanakoak aurkitzeko eskaera egin dute, legez kanpoko hondakinak ibaira botatzen dituztenen gaineko zaintza zorroztearekin batera.

Urtarrilaren 4an, Udal Gobernuko ordezkari batek prentsan adierazi zuen Hiri Mantenimenduko Zuzendaritzak aurrekontua eskatua zuela zonaldea garbitzeko, baina hala ere, garbiketaren ardura URA Euskal Agentziarena zela. Zinegotziaren arabera, ibaia garbitzea eta mantentzea ez da Udalaren eskumena, baina 2011-2015 legegintzaldian Udalak bere gain hartzeko akordioa sinatu zuen Uraren Euskal Agentziarekin. Hitzarmena 2015. urtean iraungi zenetik, garbiketa lanak "linbo" juridiko batean daude. Era berean, Udalak Kantauriko Ur Konfederazioarekin sinatutako hitzarmen batean jasotzen da Udalak jasoko dituela ibaiko hiri-hondakin solidoak, baina, dirudienez, hitzarmen hau ere 2020an iraungi zen.

EH Bildu talde politikoa

Grupo político EH Bildu

l-jentea, 1 - Tel. 943481027 - www.donostia.ehbildu.eus -
20003 Donostia

Hau ikusita, Udal Gobernuak interpelatu dugu urtarrileko batzordeetan eta ingurumenaren ardura duen zinegotziak konfirmatu du Urumearen ibaiaren garbiketan, Donostiari dagokionez, Udalak ez duela argi garbiketa nori dagokion. Dirudinez, “dominio marítimo terrestre” zonaldeetan (hau da, mareek eragina duten eremuetan), garbiketa Kosta Zuzendaritzaren eskumena da, baina URA agentziari transferituta dago, eta gainerako eremuetan Udalak egin beharko luke garbiketa. Delegatuak adierazi duenez, egun ez dago hitzarmen interinstituzionalik, Udaleko zerbitzu juridikoak gaia aztertzen ari dira eta orain arte hainbat garbiketa udalak egin eta ordaindu ditu, zinegotziaren hitzetan, “ibaia garbitu gabe uztea baino hobea delako garbitzea”.

Azalpen hauek entzunda, ezin dugu ulertu nolatan ez dagoen argituta zeini dagozkion garbitze lanak eta zergatik ez dagoen definituta eta sistematizatuta ibaiaren aldizkako garbiketa.

Hortaz, azaldutako egoera kontuan hartuta, behean sinatzen duen zinegotziak honako MOZIO hau aurkezten du:

KONTROL MOZIOA

- 1.- Udalbatzak hertsatuki eskatzen dio Udal Gobernuari Urumean egiten diren legez kanpoko ur-isuriaren kontrola areagotu dezala, Ura Agentziarekin batera, eta bizilagunen zein eragilearen salaketak aintzat har ditzala haiek antzemateko.
- 2.- Udalbatzak hertsatuki eskatzen dio Udal Gobernuari URA Euskal Agentziarekin eta Kosta eta Itsasoaren Zuzendaritza Nagusiarekin adostu dezala Urumea ibairako urteko garbiketa-plan bat.
- 3.- Udalbatzak hertsatuki eskatzen dio Udal Gobernuari URA Euskal Agentziarekin eta Kosta eta Itsasoaren Zuzendaritza Nagusiarekin prozedura bat adostu dezala, Urumeako ibaian egiten diren legez kanpoko isuriak urgentziaz garbitzeko.

Donostian, 2022ko urtarrilaren 21ean

Olaia Duarte López
EH Bildu udal taldeko zinegotzia